

Bla Gudei main frenmob!

Wal mi jidan iya langa Dameskas, en aibin wandi dalim yumob hau God bin tjeinjim main laif.

Wal yumob sabi aibin heidim detlot Kristjanmob detmatj, en aibin wandi stapam olabat blanga kipgon bulurum Jisas. Aibin oldei grebum olabat en pudum langa jeilhaus. Wal wantaim detlot serramonimen bin kilim ded wanbala men neim Stibin, dumaji imbin Kristjanwan, en tharran na bin meigim mi gudbinji. Bat wandei samting bin hepin en aibin hatkrek.

Aibin go la Dameskas, dumaji aibin sabi sambala Kristjanmob bin jidan jeya, en aibin wandi deigimbek olabat langa jeilhaus langa Jerusalem. Bat hafwei, bigiswan shainiwan lait bin shaindan brom top la mi. Ai dalim yumob, aibin brabli bradin en aibin buldan langa graun en aibin irrim sambodi jingat la mi.

Wal det sambodi bin askim mi wotfo aibin ardimbat im. Neks minit, imbin dalim mi, "Mi na Jisas!" Imbin dalim mi hau ebritaim aibin ardimbat det Kristjanmob, aibin rili ardimbat im.

Afta na imbin dalim mi blanga weit bla sambodi bla dalim mi wanim ai garra du.

Wal aibin trai opinimap main ai dubala, bat aibin blainwan! Ai nomo bin luk enijing, en main frenmob bin lafta deigim mi langa Dameskas. Deya na wan Kristjan men neim Enanaiyas bin kaman en prei bla mi en streidawei samting jis laiga fish skeil bin kamat brom main dubala ai. Afta na aibin beptais en aibin dagadagat daga en aibin fil strongwan igin.

Wal brom det taim na wen Jisas bin tjeinjim main laif, ai nomo bin gobekgobek la det olwei. Tudei na mi jidan rili soriwan dumaji aibin trai ardimbat ol detlot Kristjan pipul. Trubala, Jisas bin tjeinjim main laif, en mi oldei jidan bla im na. En blanga tharran na, mi kipgon dalimbat pipul blanga bulurrumbat Jisas, dumaji oni im na gin meigim wi jidan raitwei langa God!

Wal samtaim wen najalot Kristjan pipul midap garram mi, dei gedim shok, dumaji basdam aibin oldei trai faindim ola Kristjanmob en kilim olabat ded.

Wal ai garram bigmob stori blanga dalim yumob blanga God en hau imbin wek la main laif, en hau imbin tenimran najalot pipul du bla im wei, bat ai garra kipgon na.

Wal jaldu na.

Brom Paul